

# ՀԱՅԿԱԿԱՆ ՍՍՏ ԳԻՏՈՒԹՅՈՒՆՆԵՐԻ ԱԿԱԴԵՄԻԱՅԻ ԲԱԺԱՆՄՈՒՆՔՆԵՐԻ ՍԵՍԻԱՆԵՐԸ

Հունվարի 13-ին և 14-ին տեղի ունեցան Հայկական ՍՍՏ Գիտությունների Ակադեմիայի բաժանմունքների գիտական սեսիաները, որտեղ ամփոփվեցին երեք տարվա աշխատանքի արդյունքները:

Ֆիզիկո-մաթեմատիկական, բնական և տեխնիկական գիտությունների բաժանմունքի սեսիայում Հայկական ՍՍՏ Գիտությունների Ակադեմիայի թղթակից-անդամ Ա. Նազարովը հազորդում տվեց կառուցվածքների սեյսմոկայունության էքսպերիմենտալ հետազոտության պրոբլեմի ներկա վիճակի մասին:

Մեծ հետաքրքրություն ներկայացրեց տեխնիկական գիտությունների թեկնածու Գրիգորյանի զեկուցումը բնակելի տների կամարաձև ծածկերի նոր տիպի մասին՝ տեղական շինանյութերից: Կամարաձև ծածկերը գործնական մեծ հետաքրքրություն են ներկայացնում, որովհետև շինանյութի՝ փայտեղենի, երկաթի, ցեմենտի և այլ նյութերի մեծ խնայողություն են տալիս:

Բաժանմունքը լսեց ֆիզիկո-մաթեմատիկական գիտությունների թեկնածու Մ. Զրբաշյանի զեկուցումը «Անսահմանափակ մարզերում պոլինոմների սիստեմի լիակատարություն մասին»: Այդ զեկուցումը հանդիսացավ Ակադեմիայի մաթեմատիկական սեկտորում կատարվող հետազոտական բեղմնավոր աշխատանքի վկայություն:

Սեանի էքսպեդիցիայի արդյունքների մասին զեկուցեց ավագ գիտական աշխատակից Բ. Բեկ-Մարմարչևը: Պրոֆեսոր Դավթյանը պատմեց էլեկտրոլիտի լուծույթների մի քանի հատկությունների ուսումնասիրման ասպարեզում իր կատարած աշխատանքների արդյունքների մասին:

Սեսիան լսեց Հայկական ՍՍՏ Գիտությունների Ակադեմիայի իսկական անդամ Ի. Նդիազարյանի հաշվետու զեկուցումը բաժանմունքի երեք տարվա աշխատանքի մասին: Զեկուցողը նշեց, որ բաժանմունքի գիտական հաստատությունները մեծ աշխատանք են կատարել և դա նշանակալից շահով առաջ է մղել ֆիզիկո-տեխնիկական գիտությունների զարգացումը Հայաստանում:

Գյուղատնտեսական գիտությունների բաժանմունքի սեսիայում լսվեց Հայկական ՍՍՏ Գիտությունների Ակադեմիայի թղթակից-անդամ Ա. Մաղաքյանի զեկուցումը՝ «Արոտավայրերի կատեգորիան որոշելու նոր մեթոդը»:

Զեկուցողը պատմեց արոտավայրերի շորացման համար իր մշակած նոր աղյուսակի մասին, որը կարող է կիրառվել ո՛չ միայն Կովկասում, այլև ՍՍՏՄ մյուս լեռնային մարզերում:

Բնական գիտությունների դոկտոր Ա. Տեր-Կարապետյանը զեկուցեց

«Բիոկատալիզատորների դերը անասունների կյանքում» թեմայի շուրջը: Զեկուցողը առանձնապես նշեց բիոկատալիզատորների կիրառման նշանակությունը գյուղատնտեսական անասունների կերակրման ժամանակ՝ կերերի յուրացումը և մարսողությունը, ինչպես նաև անասունների մթերատվությունը և բեղմնավորությունը բարձրացնելու նպատակով:

Սեսիայի աշխատանքի վերջում գյուղատնտեսական գիտությունների բաժանմունքի նախագահ՝ Հայկական ՍՍՏ Գիտությունների Ակադեմիայի իսկական անդամ Մ. Թումանյանը ընդարձակ զեկուցում տվեց բաժանմունքի ինստիտուտների ու սեկտորների եռամյա գործունեության մասին:

Հասարակական գիտությունների բաժանմունքի սեսիայում պատմական գիտությունների թեկնածու Ա. Հարությունյանը հանդես եկավ «Ընկեր Ստալինի ուսմունքը սոցիալիստական գիտակցության, ուղղուցիոն տեսության և քաղաքական պարտիայի մասին» զեկուցումով:

Սեսիայում լսվեցին Հայկական ՍՍՏ Գիտությունների Ակադեմիայի թղթակից-անդամ Լ. Մելիքսեթ-Բեկի «Նոր նյութեր Խ. Աբովյանի մասին», Հայկական ՍՍՏ Գիտությունների Ակադեմիայի իսկական անդամ Ա. Տերտերյանի՝ «Շիրվանզադեն և մեր օրերը», բանասիրական գիտությունների թեկնածու Գ. Սևակի «Սովետահայ պատմավեպի լեզուն», պատմական գիտությունների թեկնածու Կ. Ղաֆաղարյանի «Դվինի 1946 թվի հնագիտական պեղումները» զեկուցումները:

Բաժանմունքի աշխատանքի մասին հաշվետվությամբ հանդես եկավ Հայկական ՍՍՏ Գիտությունների Ակադեմիայի իսկական անդամ Գ. Ղափանցյանը:

Բիոլոգիական գիտությունների բաժանմունքի սեսիայի նիստում լսվեց բիոլոգիական գիտությունների թեկնածու Ա. Յաջենկո-Խմելևսկու զեկուցումը՝ «Տեսակի և ընտանիքի նշաններ փայտանյութի կառուցվածքի մեջ»:

Հայկական ՍՍՏ Գիտությունների Ակադեմիայի իսկական անդամ Վ. Գուլքանյանը զեկուցեց ցորենի այլ տեսակների հետ հիբրիդացիայի ժամանակ *Tumorhexi*-ի ժանգակայունության ժառանգականության մասին նաև հաշվետու զեկուցում տվեց բաժանմունքի աշխատանքի մասին:

Բաժանմունքների սեսիաներում լսված բոլոր զեկուցումները մտքերի աշխույժ փոխանակություն առաջ բերեցին:

Սեսիաների աշխատանքի վերջում տեղի ունեցան բաժանմունքների բյուրոների ընտրություններ: